

Nasc ofizialmenter l Comun General

Per chest emportant aveniment l'é stat cernù la data di 14 de messèl. Chel medemo dì te la senta del Comun General l'Union di Ladins de Fascia e l'Union Generèla recorda l dì de l'unità ladina

L'é stat fissà per en mercol che vegn, ai 14 de messèl, l dì de pruma scontrèda ofiziala del nef Comun General de Fascia. La procuradora Cristina Donei à cernù chesta data apontin ajache l'à n gran valor simbolich per duc i ladins. L'era defat apontin i 14 de messèl del 1946 canche passa 3000 ladins rué da duta la valèdes se à binà sul jout de Sela per dir adaut che no i vel esser despartii e i vel jir inant adum. E dò 50 egn, ai 14 de messèl del 1996, l pòpul ladin à endò rebadì sun Sela la voa de jir inant adum. Da enlouta la dì di 14 de messèl é

stata declarèda "dì de l'unità ladina".

Chest an chesta festa vegnarà recordèda te Fascia, proprio en ocajon de la pruma sentèda ofiziala del Comun General. Da mesa les sie domesdì te senta del Comprenjorie, ades senta del Comun General, vegnarà endrezà n moment de reflescion dal titol "Inant Adum. Prospetives per l'autonomia ladina en ocajon de la pruma sentèda del Comun General de Fascia"

Dò cena da les 20.30 te la medema senta vegnarà chiamà ite

la pruma sentèda del nef Consei General de Fascia, che te chesta ocajon vegnarà ofizialisà formalmenter con la valutazions de la compatibilità de duc i componenc. Te la medema sentèda vegnarà lità l president e i 2 vize presidenc del Consei, e dò l jurament la procuradora Cristina Donei metarà en consaputa de la nomina del vize procurador e de la competenzes che te la pruma aplicazion del statut vegn dates sù al Consei di ombolc.

Per chisc prumes 5 egn l Consei General é metù adum dal

Procurador e da 30 componenc, de chisc nef lité a stima universèla, catordesc lité dai consees de comun e i set ombolc componenc de derit.

Chisc donca i inomes di componenc del Consei Generèl chiamé ite ai 14 de messèl che vegn.

Raprejentanc lité diretament da la popolazion: Claudio Bernard, Cesare Bernard, Paolo Brunel, Tiziano Davarda, Andrea Donei, Gino Fontana, Christian Lorenz, Emilio Talmon e Alfredo Weiss.

Raprejentanc nominé dai Comuns: a Cianacei Luca Guglielmi per la maoranza e Riccardo Nemela

per la mendranza; a Ciampedel Paolo Lazzer e Gianni Rasom; a Mazin Martino Cassan e Nicola Ganz; a Poza Francesca Dorich e Norbert Bernard; a Vich Manuel Ghetta e Enrico Battisti; a Soraga José Sommariva e Gianluigi De Sirena; a Moena Marcellino Chiocchetti e Flavio Volcan.

A chisc se jonta ite i ombolc di 7 comuns de Fascia: Mariano Cloch, Renzo Valentini, Fausto Castelnuovo, Tullio Dellagiacoma, Franco Lorenz, Roberto Pellegrini, Riccardo Franceschetti.